

四庫全書

集部

欽定四庫全書

集部

梧溪集卷六

詳校官庶吉士臣何道沖

中書臣劉源溥覆勘

總校官進士臣繆琪

校對官中書臣雷純

謄錄監生臣將厚傳

欽定四庫全書

梧溪集卷六

元 王逢 撰

擬河清頌

有序

草野臣某言臣本江陰鄙人也素不希仕進甘分壘
晦讀書向道以詠歌雍熙之治比鄉邑多故客遊吳
下且七年今年春三月躬聞黃河變清混合雲漢昭
融光岳青徐齊魯淮楚之間神人驩忭魚鳥咸若卉

木品彙盡沾休澤竊惟河源自天注地中經亘衺衍
不計幾萬里夏禹疏鑿功用同天厥後華夷殊域雖
代見澄澈誠未足當天地嘉應我朝一海宇昆侖慈
嶺始在化內仁治德流垂及百年天用彰報陛下陛
下仰契俯察日夜澡滌心慮拯塗炭下民以答我皇
祖考之祐昔漢以甘露降而紀歲唐以醴泉涌而製
銘臣謂自三代來莫此為盛陛下聖德遠邁河伯效
珍固宜作為文章聲之樂官薦之清廟特著國典傳

示無疆顧不偉與臣思深涵育分踰贊述謹獻江浙
省以聞頌曰

皇帝即位三十春黃河變清月在辰乾端坤倪浩無垠
一氣混合析木津昆侖慈嶺涵大鈞洛渭淮泗嘉應臻
風魚無菑龍擾馴桃花不動波滄淪陽和郊輶見鳳麟
紫貝宮闕闡怪珍河伯率職海若賓天其念茲昏墊民
予以淨洗戎馬塵槎蘖沾丐咸與新江南布衣草野臣
踊躍百拜頌斯陳於穆世祖堯舜仁大禹功澤歸聖神

予讀王逢氏河清頌辭達而意敷得歸美之體鮑照
不得專美于前矣故為書之前太史知制誥鄱陽周
伯琦識逢擬此時至正甲辰歲公則以江浙左丞遷
南臺侍御史不赴遂告老中吳云逢敬書

懷先民賦

有序

烏涇世儒僅有張氏其先開封人仕高宗儀鸞司門
既扈南渡樂是卜居後寢昌大離列苑第曰太祝曰
上舍曰進士角德翼義咸負譽望曰驥院質木饒貲

益丕拓湖苑屬元初官脅售其第為倉征邏司族就
哀替十有三世孫隆力田授徒幸延餘緒搜攬遺勝
疏濬剗荒於是小山平林襟帶溝池凡樹石巖壑一作

磴以植以闢積勞于躬初有成趣至正丙申苗兵燬

掠榻齋僅

一作歸

存又十年隆盡歸之於余乃因其舊

稍更新之增崇浚深標奇著美遂號曰寂閒園且次
其所在用載用詠之矣尤懼跡忘於漸事湮于久復
名其山曰先民一丘溝曰先民一壑立表兩間清浥

秀華庶乎見景慕于前脩聊示崇廣于來裔也予不
敏蓋有賴先君子庫司勤公於茲土天用食報畀有
世業於乎凡我來裔詢事考跡以無昧於先民則吾
先君子之德其忍有忘已乎序而繫之賦曰

繫予嬰世患兮幸謝病於藩垣家轉徙而仁里是擇兮
得儀鸞之故園仰有時頗有流兮若天建而地闢矧磴
繚崢嶸列兮水滄盪夫橫碧樹聚轡園且合兮起拱
把于封殖蔬畝麥疇胥映屬兮匪一朝之人力詢肇基

于隣叟兮曰高皇之南巡箕塊輦石畚鍤並興兮冠蓋
續如春雲迨國變而門祚中哀兮尚衿佩之振振何集
蓼于暮齒兮室罄懸而研廛夫絺褐代服兮鼓鍾代奏
鵲巢鳩有兮鳩弗善構緬惟顯考兮著效茲土默相俾
承兮猶曰納杵期一日必葺兮覲三年有成懲鳩毒與
狙安兮懷熊膽于劬經在舊喪有賻兮田祖有祭一丘
一壑兮先民用字延余薛之顯與兮激烏黃之濁流鑒
雲間之聞唳兮杜谷口之鳴騶企文學于東吳兮夢禮

樂夫西周庶景行奕葉之作者兮而忘其倣顰學步之
貽羞亂曰饗有蓂兮捫有蘿流浚深兮峙增我月闌林
兮露洒翠直少微兮迴明河魚戢戢兮沫煦雀脩脩兮
影摩山鬼卷甲木客寢柯伊予弊冠藏之層阿造化邈
焉畛域兮萬漚咸歸一波感氣類以相聚兮宜神鑪之
聯過於乎孰謂同野可哂兮而爭墩之可訶

林屋餘清洞賦

有序

洞自予始而最閒園之清勝並華前後左右中峙直

節小峰一殆主山也下列樂石二曰泗磬曰豐鐘用
節咏歌長夏客徑造團蒲或坐移日因作是賦以見

慕志云爾

餘清伊何秀割林屋土山抱石峰矗拱豆岡負甕谷
菱芰仰篁木通壁門兮包洞腹雲一窩兮陰四綠冰百
步兮寒三伏憂泗磬兮豐鐘口商歌兮踞吾足蛭如知
兮移饗鵠胥志

一作志

兮下浴水幽黝兮涵衣日早曠兮

隱轂夫赫使兮彈鴨

陸魯望

與兄兮友鹿

李涉勸

濟虎兮

巖居

單豹

朱猿兮蒿麓

高太素

彼或不死以尋盟願躬

候兮邀躅好風誰將適洒徑苔高士杖憇孤臣襟開我

巾飄飄倒影在杯顧茲盍樂鑒昔可哀文賈謫于新室

琴挑奔于蜀臺鸚鵡殺其鼓吏沈香竄夫仙才幸羊質

而早戰延馬齒之待推尊悼暑王梧悲秋回瀉地苦汗

漿征塗浩歎埃席帽之翠岌然挹練江兮故園鞠為蒿

萊兒且闢而且搆兮庶往還兮優哉童蚩蚩兮割大笑

奚嫁耻乎陶曇

言歸吟

歲反闕兮蓬戶月微行兮藥圃兒相舂兮婦秉杼不遑
家邨兮寧疾世迂弧矢具弦兮狼角若崩雖以聞雉兮
場安闕鷹隼黑颿作兮曛黃蜮興有求山人兮言歸于
澄澄

六歌有序

六歌者最閒園丁之作也丁昏娶幸畢齒髮加暮才
業不能上于人足跡則與勢途相背蓋二紀矣夫考

槃采芝世莫追擬是什也竊惟豐山鐘霜至而自鳴歟

其一禮雲曰

雲何禮兮山中高子兮天南東或碧合兮素抱類愁

思兮從無龍獸金晴

一作精

兮降西極挾風伯兮走沙石

鷗退飛兮鴻無留跡渺親舍兮獨耿耿聊致恭乎松栢

其二懷霖曰

楚軍挾纊兮燕谷溫我姑置兮緬懷殷人殷人兮為誰氏

感高宗兮巖穴起霖大旱兮舟大川上
斲析津兮騎箕尾聖途壅兮賢違有苗
猖兮獸隨據梧瞑兮曾移時恍三尸兮
籲帝以詞乘大輅兮冠皞皞雲翕奕兮
降下土

其三賓月曰

寒霾轆兮安之陸媚狐兮川嗔鯨帽高屋兮裘重披偶
賓月陽岡兮如夙之期光溢林兮爽浹豆卮石立諸生
兮後先孔儀舞鷄念狂兮飯牛志睽氣夜存兮鄒孟實
師井絡東上兮河鼓向西望舒駕邁兮影流堂墀今時

何時兮斯覲匪夷

其四埽葉曰

冬迫兮秋徂鳳郊麟極兮無時樵蘇溪園數畝兮兵殘
燹餘林葉燹燹兮若天委地輸且箕且簞兮磬折老軀
勞甚矍駭兮心無其虞彼薪蠟屋珠兮貧莫我俱

其五采薺曰

山黃落兮虎現石體水歸源兮洲露鯨尾乖雷震兮喪
七馬無馬兮車無柅病謝至屢兮鬚變餘幾童孫何知

兮跪進素履諒苦節卒貞兮園菜有薺

其六 嘸和曰

寒日薄兮西枝身重壯兮無時慕伯玉兮耆化忘李廣
兮數竒維馬兮齒老前齊師兮病知道鱸脩大兮泳淵
雉華章兮伏草誰其逃兮民之先嘸至和兮彈無弦白
雲抱石兮青壁劍刺天關柔不肉視兮內養維全

黃良臣哀辭

有序

辛亥春某倉儲事覺上海連黃氏子良臣良佐械送

秋曹臣謂佐曰元季凡隸於倉者猶荒雀趁熟耳今
倉禁嚴飛灾況逮不翅火燎毛我本孤哀嬰保護之傳
教之迨長皆叔父賜非叔父垂出幾何矣我幸無內
顧辜功第委之我爾生還葬我先壟以報叔父于地
下歿存庶均安乎遂相對慟開者莫忍仰視比推鞫
一如所言而佐果得釋叔璟和謙慎好禮與予善臣
氣幹類燕趙產孝友蓋由天性云佐一日衷麻拜請
曰佐伯父母蚤世伯兄又徇義死黃氏德祚延俾舍

中有一尺雖必屑伯兄後先生丈人行辱過聽焉予
嘉憚久因附其言於哀良臣序辭曰

大夫殲及城火遺酷吏獄具牛毛辭借死厭衆古有之
子安者何命非時驚風千林枝葉披柳車道擁山川祇
伶俜從弟莫已思斷天繼祀將弗墮我哀蔽以七字詩
朱顏鐵肝天下奇

焦德乙郎哀辭

有序

焦諱白字任道本淮人遷長於吳材志不羈張氏初

辭湖學教授避客泖海上興到作詩畫率不凡醉或
濯風弄泉曳影月下俗目之迂白自若也張亡在所蒐
儒遂變名德乙郎浮寄冗食僧舍惟久於嘉定

關林

原家一夕心動省母吳城為門校察延淑其子未幾
郡曹桓至部日以還養告弗獲寔且病或諷曰若頗
而髯黃金加鞶爵列侯等不猶愈帶索耶輒不答去
殆伏枕作書二一囑嫂姪善事母一謝諸舊卒時歲
在龍壽甫五十考文垌天厯間社稷署奉禮郎予其

兄行也哀之辭曰

德乙郎皎皎衣義不汨鱗長干泥裹骸骨以歸無從淚
揮噫

曹傳哀辭

有序

傳字幼巖宋賜金紫鄉先生碩之十五世孫也至正
乙未亂父銅陵學諭諱思順憂悸歿辟地既兵猝至
二妹義不受鱗胥蹈刃死傳被創絕復蘓幸姊甥竄
免共畢葬轉徙至海上丁酉秋以予薦主張林塘家

首過焉出累葉遺橐一束謂曰傳僅保此天不斬簠
桂餘澤使枿復芽而復有儒脣家難庶其忘乎子答
曰仁者必有後自是交忘年十年屬歲丁未八月適
中寒卒於乎傳孝弟篤信人也奉姊稱賢節杜母訓
甥矩作鄉社師在平居間言動文為又非淺露器而
壽甫踰四十子嗣縉始二歲嗣紳未晬其命耶賻以
斛米斗酒哀之辭曰

虎之斑兮雉儀叅敬輿兮持衷旗深褐衣兮盤帶垂弗

利逃亂兮適丁禍奇親憤卒兮妹義死痛巨創兮氣餘
絲藁葬兮封土姪灰容兮共艱苦野晦昧兮鸛警晨沙
衡徙兮雁遵序蓬轉糴食兮方及此海塢假館授徒兮
粗緝世緒不大厥鑊兮烹小鮮無肉於豆兮有蔬于簞
嬰襁褓兮乳下甥佔嗶兮膝一作席前夢聚桂曹氏坊名

兮拚發懷孤栢

父號栢窗

兮蔓纏何東南海變革兮終

厭氛而長捐於乎命由天賦道繫時尼奚悲鵬止焉

樂馬失諒消搖故鄉之先隴兮故慈龍兮綺秀鬱孔禰

交不可復得兮聊嫖嫖是吊莫之以卹爛雲兮華星愴
對兮篇帙

仲倩許生柸哀辭

有序

柸字友倫為同郡許泰和之季子予之仲倩也許氏
醫承十有四葉而柸孝友睦卹之聞錚錚族里間尤
工詩鵲綬翬章影日林澗不幸三十卒予撫哭曰許氏
杏失一林吾家詩減一派矣既哀辭曰

榴英英兮朱房芰濯濯兮翠裳笋登藟兮蕙宜纓雨壤

風折兮又隕以夏霜行豐壽嗇兮仲倩之傷傷之兮復
何喟悔交來兮志孔厲高扁鵲兮去晉陋華佗兮死魏
已焉哉詩減一派兮載滂予涕

租籍銘

有序

租籍一帙先庫使菜亭翁之手書也逢倉卒去乙未
亂物多散遺而此儼在沾洒伏覽尊容如對之字畫
外因憶幼侍側承言近代有王士良者本庸氓歲租
入義令種戶自量士良字由自量易致感雨蘇早見



載鄭上舍所南錄爾小子善推是心曷事不濟逢佩
服幸老矣序而銘曰

粵昔去亂廬燔田墟手澤之存百艱身俱維存維天猶
古作則繁星寒芒蒼栢勁色秔冬麥夏平恕行稟醪馘
餼漿汗力是貸偏陬下邑一石二科倍取旁歛貪涓成
河孰善為導庶草風靡歎恨聲蠲胥樂田里孤露餘生
弓箕忝承序銘籍左用飭後仍

銀星硯銘

有序

硯江陰許泰和氏所藏物也膚理縝潤微縹有星熒
熒然印若銀礫蓋歛石之精者周郭纖罔上下均一
而模製尤工既以徵予銘予謂許自扈宋駕南業醫
凡十有三葉迨泰和道益彰更涉世患族姓具全遺
物並在其守之確施之溥者歟遂為銘銘曰

少陽委精歛孕英金礪玉琢發素芒體虛用晦泰和堂
涉世多故同壽康孫孫善藏世永昌

張氏石几銘

有序

几蓋元故叅政公諱瑄園堂中物也成宗朝家沒几
為隣有幾六十年兵興世遷而公元孫守中文行日
脩勵几復焉予嘉歎而銘曰

趙歸璧合返珠茲几石二者殊不迷復有孫儒祖來馮
光氣敷心祇若左右隅浦維黃涇維廬尚永傳戒爾孥
章氏澂懷樓杯銘

無查渾酒則澂無物欲懷則澂汪汪春波維德之朋

山雲杖銘

鮮衣怒馬彼皆子舍敝裘帶索子不我却富貴多危貧
賤乃安將子是倚是賴尋薇藿於山間看牛斗於雲端
庶乎免世俗之難

俗作路

瘞冠銘

有序

冠名製不一予中歲始冠處士冠養疴最閤園自是
或栽而瞻仰而捫俯而擷者九閱寒暑一夕戴微月
入幽貞谷將登濯風之所適露磴滑足側冠觝石以
裂因憶九寒暑閒避兵塵再令儒卿守臣致書幣以

子應詔三卒苟全且不起冀復舊業與之照影大江
挹爽君山至同朽席帽峯隴下詎非願歟冠已矣子
忍敝之乃會數遺老愁而蔽識而銘曰

予髮根于天禮維爾先寧觝石碎不抗塵全噫以爾
不若屢屨以表以辭異夫敝帷首則惟新心其故心

儉德堂端研銘

維平維方違險蓋常兮維重維厚靜乃克久兮玉韞

閑

類養引恬兮殆惡文著雲霞緘兮時否斯貞道亨其

泰兮

存心齋門銘為郡知事海寧楊子明作

一氣肇分萬彙其芸芸乎命于兩間最靈其惟人乎心宰夫身其猶君乎六鑿其從而委臣乎其靜也先天地而存乎其動也後天地而神乎疇亡其誠而離其真乎蓋去其根乎倚歟元僚其探其存乎爰闕齋居八窗洞然其無塵乎藏脩息游儼若思之辰乎存所存其事天乎推所推其新民乎朝斯夕斯將同歸道義之門乎

鐘銘

有序

上海靜安寺舊鐘入於官寺僧覺曇募銅至六千斤
付鳧氏冶範成且有日乃介前淨土住持元淨乞梧
溪山人王逢銘之銘曰

金聲為物鉅曰鑄深徹泉府高達穹谷傳海應流景風
祈息諸苦開羣蒙耳根一作塵空淨心觀通六窓具圓佛性

同搏拊功施垂無窮

虛龕箴

有序

韓景賜司丞子頤聞予密室成為寄木綿布帳用資
勤學因顏曰虛龕而贅箴左方

龕中虛息以予予虛中靜與俱夫舟載諸物轂運八徼
光燭羣暗谷應萬窮虛其妙哉君躁於治而民轉犯虛
其竅也臣急於察而吏愈貪虛其塞也父子夫婦兄弟
朋友凡慊虛者世莫疚焉使一日拔地起山嶽而不為
礙使一時亘斗彌雲霾而不為昧不隘于江海漲溢不動
于風霆震駭斯虛之太者乎嗟夫顏子實若虛予老未

聞道卧而氣昏坐而形枯烏知易之用二行六爻位蓋
無中庸心學天人同徒將蹈晝寢聖謂何誅

三教圖贊張渥叔厚畫題於味蓴軒中

東魯一貫西方不二老氏得一教分道異忠恕而已竊
聞諸師厥它未遑莫既贊辭

石生贊二首

有序

密室前列峯石二曰蘄角生玉筍生中置小碣命工
刻辭發善懲逸庶望子弟焉耳

石生嶄角重厚端確出我門地隱若一岳浩氣直養道
體有卓立雪肅然類也古學礦頑受煉璞渾聽琢誰甘
下愚視此罔覺

玉筍石生秀銳直貞抗節淇綠含和藍英伊誰偕藏漸
角肇纓梧月貺彩竹露與清軼塵虎丘嚮風穀城用默
絕晉永崇令名

癭石贊在先民一丘間

石有癭璞無脰無脰健走以售速剖有癭健守不偶致

壽吁山數歲疾天造就爾質

直節峯贊在林屋餘清洞間

小峯直修礫砢錯節靜壓巖洞崇餘林爰矯矯生風隱
隱豎雪受命不回我瞻則悅

鵲生鴈傳

鵲性剛慄身視鴈不能十一凡見鴈經巢所輒不絕鳴
奮焉翬旁批上擊鴈引去乃返若護林然故又名鴈舅
鳥有蠟味者子將誕巢率依鵲否則穀為伯勞害伯勞

即鵲鵲惡鳥今年丁巳鵲巢最閒園大柿木既產雛一

狀驚而小色竊

古淺字

藍元白間稍察

一作覲

之則屬也屬

克自肉食徐遠適云或曰昔宋康王時雀生鷦不久社

屋今鵲過惡保善俾他類遂生養與雀異鵲種九出則

一作咸

應天時闕人事少皞用名農正官尤非鷦儻斯寵

微乎予聞而輟曰予涉強壯年未始祿升斗茲謝病且
老尚奚覲然帽峯隴畎在天其示歸田哉

走菜對

漁者市蜃蜺而號曰走菜怪而問焉漁者曰是蜺也俗以走菜名逢曰菜穀之配菜熟人無饑色此名辱菜甚漁者曰此菜名猶昔一作晉人以魚為菜也逢曰奚以走

為豈其蠖蟻然其目炬然其足戈然其居穴視專城然水吮草食橫行無前得無螳螂觸輪之勇乎漁者曰螳螂激壯士有功彼雖披堅執銳不過據地馳貪而肆暴遇敵則走以幸生如是而已逢歎曰蓋色厲而內荏者歟今食焉而避其難者亦其類耶

時聞黃岩官兵不利一本此註即在題內

漁者啞然笑曰子未知走菜曾不及烏賊胸中有甲也
尚敢望螳螂哉

題顧栢貞松泉卷

長松陰寒泉離離石堪把幽人於焉隱
頽仰與世寡鶴巢雲卧時猿飲月明下
悠然古根坐漪舞翠雨洒餘齡
三休真咋一作昨夢一炊假萬有靜觀妙庶希
得道者松花釀來醇客至歡洗學

贈陸貞婦趙氏有序

氏為安吉幕長澤之孫女而鄞處士陸燾之妻也至
正間兩浙多虞燾辭海寧主塾與趙隱居松之瓢湖
丁未夏四月海隅有警既兵猝至夫婦倉皇赴舟未
遠同難者爭舍舟陸竄燾登岸復將携趙以行而兵
偪之傷刃者三遂仆深淖趙遂自投于淵時有歌之
者曰四月三日兵撓湖婦女多被辱與驅殉節伊誰
天水妹燾字子臨雅交于逢逢序而詩曰

瓢居澤國與艸木潤不枯十年溜清氣鍾毓貞趙軀貞

趙名門息良人列仙癯廿載甘蓼同一旦幽明殊覘雨
有穴螳相風有竿烏夫夫婦職焉知兵為虞維北崇
凝山廟貌秦三姑似傳雲鶴君招要天水姝綃裳翠羽
蓋明月雙佩珠邦侯俾從祀庶激後世誇

愛萱堂

有序

愛萱堂者瓢湖夏生鼎奉母吳氏之所也鼎與母弟
鼎幼失怙吳時甫三十志不再醮撫育二子及長且
迨碩儒以訓淑之至是並敦學行崇孝養名其堂曰

愛萱前進士錢思復為記其事母今垂老而康樂逾
壯年予併美之詩曰

故侯義種瓜隱士義採芝孝子知愛萱樹對母氏帷雪
芽獻春饌緗縈拱坤儀天人至交成裕然全貞願瓢湖
清且連鮫館冰蠶絲方諸淨開鏡伯仲雙從嫠長願寸
艸心釀作蟠桃卮嗟嗟凱風詩棘薪定無時

故鄉先執贛州興國縣尹葉公挽詩

有序

公諱森字仲實其先江陰人凡七世止一子故無支

親曾祖青祖起采潛德弗耀考祚蚤孤自樹會元師

南下率西鄙數千百人逆謁裨將

一本有陳字

於陳沙莊

昇矢一及尺帛答里族賴以全公性愷敏通蒙古字

學郡推擇為譯史兩轉授將仕郎兩淮鹽使司監運

綱船不勞而集改鹽官州判官適大祿負海寇聚免焰

蓬勃公擒其魁迨黨豎十八人時斗粟十千殍殮枕

野屬倉庫並罄義激巨室發贏糧三千二百二十九

石鈔八百五十三定賑四萬七百人復以二千一百

四十五石穀直續濟二萬六千六百六十六人不足
又勸善富米一千六十石給三千餘人省臣嘉公救
荒有緒檄攝富陽一如治鹽官得米二千三百石療
饑民一萬一千一百一十九調新喻判官時蒙山銀場以
官值抑民市木炭由州抵蒙路陟靡即上白西省蠲
之旱併僚吏齋沐以籲雨三日農以穰慶丁父艱起
擢上高縣尹俗尚訐有大猾況莠挾子姓作民害言
之部使者榜諸市仍疏惡於門以幾出入豪橫股栗

邑中浮梁當要衝歲脩輒歆圮躬募義士黃氏等共
分田置莊贍費自是梁永固官無煩焉繼母吳恭人
計聞奔還哀慕如實生已服闋陞承宜郎贛州興國
縣尹比命下先道病卒時至治二年也壽五十八葬
祔黃歇山祖塋子仁廕嘉興石門巡檢累遷至從七
品樂平判官涖政綽綽有父風而優於問學樂平子
材版授蘭溪判官蘭溪子齡一日袖同進士出身傳
貴全錄事所製公墓銘過予拜有請予惟生晚世一作

太亂甘晦以老竊嘗錄忠孝節義數十百於鄉先執
敢辭乃敘其概追挽以詩曰

老馬知歸途游子久異縣鑿鑿鄉執銘芝鳳喜及見士
生遭登用似帆得風便雀藪拔岩門菜色驩海甸山丁
蠲徭役田畯慶豐羨猾懲蒙股栗梁輦衆心眷計奔繼
母喪淚沁沙彌薦吉服戒中路河嶽氣悲蒨遂成采真
游就謂游魂變幹蠱光後烈竊交忝遺彥大江流踈星
其波自紆練安得六七公為嶽

一作擬

襄陽傳

題金故翰林修撰魏公狀表後

有序

公諱璠字邦彥弘之順聖人也曾祖餘慶大理評事
寬獄多平反祖子貞都建館酒使父德元甄官署令
公忠明剛簡奇節自負由太學生中貞祐三年詞賦
第丁內艱服闋調會州司候不赴正大初補尚書省
令史時上廣言路公首論將相非其才且不當立宣
宗德陵脫河關失守必懼凶禍權殞隆德宮便故事
省史無言事例上優詔答焉事竟寢遂辭退遷裒信

縣令邊邑也屯兵橫虐民公按法不少貸衆擁其長
挫辱之公正色折以理莫不褫服改儀封大建孔子
廟三月政教興以母高年老請就養京師七年倒迴
谷之役屢捷僉謂中興可冀然將臣駐兵關上莫肯
席勝逐北當國者又力主投瓊孤注之說公憤然上
封事引喻符秦淝水之戰甚剴切不報京師戒嚴復
極言勢危感矣外鎮曾無勤王者唯隴右守帥完顏
呼沙呼可委仗宜遣入一作論大計如訖無人臣請

行又為權臣所扼閱數月沙呼提軍入援上悔無及

桓

一作恒

山公武仙頓兵五塚山上欲趨之難其使近

侍李大節薦公召拜朝列大夫翰林修撰時國門外
烽警相望公感泣拜命比至仙已遁部曲散無幾公
撫集數千人推可帥者造符印予之自劾矯制罪以
聞繼訪仙在留山公直踵焉或讒公奪若柄仙怒兵
皆露刃外嚮顧一吏與公辯公大聲曰將軍過信讒
不加禮遇乃俾齷齪一小吏與天子使置對耶且將

軍猶狐疑山谷間而左右無異心者以天子宿將故也苟不尊天子命安保麾下不有奸名犯分者乎將軍務鼓行毋慢王命也仙揆不能屈出見公公激進援卒不應聞乘輿播遷間道走行在仙已遣人誣奏公罪上以其謾不問天興三年再自歸德扈從幸蔡城陷北歸賢聞達皇元庚戌歲詔徵之尋卒賜謚靖肅無子從孫初後仕至南臺御史中丞仁宗追贈公翰林承旨初河南叅政謚忠肅其孫山東運司知事

貫久避地吳淞世革後貧窶益甚而不苟祿仕間示
予家乘既為題其九世從祖子平叅政致仕誥復合
渾源劉郁河東高鳴所製靖肅狀表序之詩曰

維公發魏科戾契仁叔世疾風草彌勁錯節器乃利心
折謝玄師志奪韓愈使及歸國如燬涓水莫止沸彼蒼
鑒忠赤異代豐爵謚狀表垂百載讀之凜生氣羊頭醫
一作翳桑乾貽厥漫刺字鱸江歲復晏搖搖雙蘭柰有懷
置無言抽毫竦神思

送楊生遂出贅

有序

生字士初為芝泉先生孫又從游予門茲出贅請別
也贈以言曰秦俗行雲間弊滋甚矣近見巨室壻某
老且有孫而家廟僅有妻祖禰神主因諱曰若承外
宗則歲時饗先將若何其哽泣不能對他可知焉生
永嘉鰥步世儒族幸鑒此毋蹈生拜受已徵詩詩曰
秋清五絲興僕夫臨庭除郎君美冠帶出贅南里閭借
問何所將一笥先世書外翁朴茂質

李延晚居

新婦玉雪如

牛羊充後闌壓稌環前渠強近親復盛行矣慎向趨情
昵移素存溫飽忘遠圖願言于飛燕更效反哺烏同室
異祖祠祭告誠交孚傭販化成俗毋煩邦大夫

題武州守張公奉先遺槩後有序

公諱思孝字奉先高曾祖仕金世居潼因亂徙家雲
中父林饒貲善殖閭一伍枉人貸錢粟輒予比償輒
諭曰粟易罔陳錢散罔盜予本意也奚以息為或婚
喪弗舉助賻靡恡有相者曰若多陰隲當生子貴而

受封公生年十三師事燕名士史彬然繼授尚書于
姚匡弼遂博學長文辭由儒諭正遷前衛教授陞昌
黎尹未赴分省圖魯叅政辟為掾至正己亥寇闕偏
城公率哨騎出翦六醜首還而圖魯遁急追止曰兵
民莫不奮志決鬪勝則功顯死亦忠也苟棄城走如
責守何夜復潛往請以族黨家僮前鋒自効卒弗聽
既他將博囉代鎮朝廷咸推公謀辯改擢都事凡獄
案覈讞平恕明允衆號曰秤都司云轉守武州皇贈

林太府監丞尋以武重地常調官難設施奏署公行
刑部負外郎兼知州事於是材勇集爪牙樹法律嚴
整強暴沮伏然忌將多弗協戮而國步亦蹙矣洪武
己酉召至時宰數獎勉留期年卒辭歸謂子亨曰此
無負吾學耳壽六十四終妻夫人華亨婦劉罹兵不
辱先公死之舅氏及繼母妹老無依養葬並如禮育
姙舊子女孤貧者凡三人俾習善藝嫁娶焉迨所遺
橐有訓亨曰意當極快處心有不平時少忍應無害

欲言宜再思題二喬曰綺窓花落東風軟曾讀曹家
女誠無懷慶道中曰一眼濁黃天塹濶半眉老翠太
行昏辭歸述懷曰敢效子陵辭漢爵願同巢父樂堯
年志行際可見矣亨并乞子紀詠期慰公於無窮乃
序而詩曰

雲中漢名卿恒山南鬱紆桑源匯金龍

池名

栢林亘飛

狐剛勁風氣闢文章肇崔浩虞

世南

彬彬張奉先發軔

三轉儒薇省首食蕨花縣遑治蒲塔幢梢昂參

公嘗登咏雷

湫薦潢汙

雷山嘗祈雨

別業虎峪側棗柘聯瓜壺霜寒快雪

霽小隊短袴襦瘦馬從黃蒼逐兔充燕娛塵高冠闕

一作

關逼翦醜六血顱倡勇願率先遁將寢所謨朝命佐他

幕蔚破楊誠俘一時秤都司綜覈無遺銖武州遂綰綬

刑部仍公符堡列屬鼓鐃齋開衛戈爰焚黃拜酌酒五

色日動矚不謂鄉困弊洊罹兵掠屠家蹈白刃雙兒泣

青燈孤雁賓羣入楚蜩蛻單達

一作達

吳有天戴重泉無

地返故都豪遺累百首暗夜光壁珠烈烈悼亡詠汪汪

運甓晷遲遲去國懷落落逆旅酤憂憤何當平忠義日月俱竊笑投閣老玄經與童烏

史彬然者周王謀客也勸王即位虎林詔天下然後之京王遇鳩文宗搜邏謀者彬然聞張林重士尚義變姓名託焉至正初如京與宰相啟有曰運籌聖惟之內寢而不行草詔御榻之傍惜乎無用及見禮不少讓或勸之彬然曰我向侍先皇燕坐彼皆執酒炙者耳仕祿寧不得氣即不能下也既奏擢翰林應奉

上曰此先帝遺宿宜獎大任宰相對以布衣須循階
秩彬然嘆曰吾衰矣豈為人應文字耶歸志浩然壽
終高唐鄉里其於經史天文術數罔不精該嘗語武
州曰惜汝幼不能書受吾學汝垂六十當見國改汝
家子若女必有以忠烈顯者至是果驗云

謁浙東宣慰副使致仕任公及其子台州判官墓
有後序

殘陽燠青苔檜夾神道古眷惟任公瑩窈碑幾風雨龍

江餘衣帶駝阜猶偃釜荒寒蠟尊

一作聚

埵慘淡蛟徙戶

舊封四名邦包絡吳水府不有疏導跡未已昏墊苦右

軍社稷器世仰法書祖公也白公鄭潭才游戲追顧虎

台州我姻婣

一作姪

晚節託玄圃祔隴面北辰霜至亦宿

莽愴悅來軒車頭顧愧章甫

予避地青龍時間遺老言東盡艾圻浦皆葭荻茅篠

居氓十餘家日弋水禽野雉為業公產是間輒異羣兒

習負笈力學年十八茅郡試既冠宋革命袖一刺見

游平章奇之辟宣慰掾繼省授青龍邏官俘蟠龍寺
作耗者盡釋脅從至元二十五年擢海道副千戶以
功轉正千戶會征交趾改海船上千戶是年浙西淫
潦建言河沙匯乃吳淞咽喉不先此而他濬罔效大
臣不納後果湮塞大德七年重濬平章舍哩起公督
七十餘里萬畚鍤之役井然有條率入覲成宗勞賚
有差進都水監丞至大元年除同知嘉興又明年遷
中尚院判官適大都通惠河閘底鑽水汎湧流覆舟

訛傳有怪物中書檄之不魚旬繕完會通梗澁復窒
泉眼鑿僵沙舟楫以達進都水少監河決汴梁溢入
歸德府治公結蘧條鳳埽賓河口築堤五百餘里以
扞橫流編戶奠寧延祐三年出知崇明脩學闡教民
胥興行至治二年鹽官海激岸圯一作崩鎮江練湖淤
積並命公治海岸以固邦賦無阻泰定改元詔賜銀
幣與行省都本左丞部六郡夫疏導吳淞二道大盈
烏泥二河事竣加江陰尹以七袞聞上不聽特任都

水庸田使司副使計創石閘六築塍圍八千浚溝汊
千有奇太湖衆水東入于海四年鹽官海荐為害公
一如制河決用再特安以中憲大夫浙東道宣慰使
司副使致仕壽七十三卒公諱霆發字子明月山其
號也所著水利書具存尤善畫其熙春天馬二畝仁
宗詔藏秘監其先本徐邳三山人考珣贈高郵知府
妣夏妻高贈樂安郡君子姓多致通顯曰賢明精實
太師針煇至正初學士揭傒斯引見上欲官之辭歸

監丞陳旅送以序曰賢佐由廕累官台州判官階從
五品遭亂遂遠引相知予久長兄掖實娶台州女歿
而自烏涇往祭就謁宣慰公墓宣慰孫璞嘗割田二
頃贍青龍鎮學中年謝軍職迨世變一褐畝廬義不
去圻上因示墓碑乃錄其槩于詩後以歸之

覽魯道原提學舊送巴延守仁會試序

道原淳安人守仁善畫竹

草玄收子雲養生殺叔夜言從奚行違腹誹或唾罵魯

公山澤姿天子親策射一丞丁喪亂累辟力辭謝影息
還栖貲臍退食柏麝茲文氣忠激玉杓迴紫華匪惟振
懦頑實足裨教化千厓天機露萬水淮海瀉鋤菜少我
匹畫竹無爾亞每過鄭同襟徑去阮獨駕春暝會飛舄
兩兩淳安下帶蘿拂松花絮酒瀝蘭籍尚懷推兄行繆
敬沈元舍沈元之杭士重義好客嘗辭文學官薦兒掖後執經燈前講王
霸特立筆已矣竊嘉一作喜頓增價為移淇澳陰茅齊挹清
暇

鴈門秋意圖為大同郝雲表題雲表偕其弟驥久
僑京口命費松年寫此以寓鄉里之思云

代州嶺頭開北扉地形倍高風斗威張遼爪牙將名在
沙陀獨眼龍潛輝晉汾水落趙日微楚萍實大吳荻肥
雲中羽儀伯仲氏南來雨雪序不違北辰煌煌天旋機
伯仲行逐春鴻歸春鴻歸永蛆美拓拔舞進葡萄紫人
生無如樂鄉里

柳津孤雁圖題送烏涇黃生鼐往潁上兄所

浦水渾柳津

一作條

短短忍攀渾莫浣才郎衿佩青於莎

將隨孤鴻渡淮河酌之兒觥歌驪歌歌長酒深奈別何

邊至愚竹雉圖歌

有引

至愚諱魯生宣城人材器超卓以南臺宣使奉臺命
西諭時嘗為鐵厓楊提學寫此圖後至愚竟以不屈
死朝廷追贈南臺管勾鐵厓既序其事復徵予為之
歌曰

南臺管勾有氣節手寫竹雉心石鐵鐵厓捫其三寸舌

奉命西諭慎開說韓愈一使廷奏說竹不撓寧寸折雉
寧死不苟活使衣無光日明滅悲風蕭騷一作吹馬驥
齊城竟蹈躪生轍土花尚碧萋弘血我為作歌旌汝烈

吳興楊烈婦辭有引

楊節婦吳年二十五有殊色至正丙午秋八月大兵
將徧城吳自揆汚辱生寧貞白死攜二子竟投茗水
逾月城破父媼見其母子並浮若不相離咸嗟異焉
天台旭元明長老交吳之兄為誌其事予又因旭請

詠于辭云

丞相師昏長夜酒

謂張士信

司徒援絕憑城守七萬兵分諸

將屯坐視霜風折蓉柳冰肌月貌忍泥滓錦棚騰佩同
歸水九原無愧先人面終身不作他鄉鬼君不見雕戈
白馬氣如雲昨者烈丈夫今日降將軍於乎楊婦吳氏
何可羣

汝瓷解引同張耘老薛古心倪自明三道叟賦有

序

解本宋高皇壽成殿花瓶御書遺刻尚在既破而工

人裁為解故人某購得之數出以宴予後某以憤卒
解今見於他氏感歎不已形諸短引

汝州瓷冶灰久寒壽成宸翰猶龍鸞黃金為相號曰解
酒面細縕舊花氣我嘗酹月江動搖故人掀髯把風袂
君不見周鼎遷秦缶歇露盤傾唾壺缺嗚呼髯兮死憤
嫉一鄉之翁得珍物親朋交歡勸酬密席端淚落哀慵
筆

贈朱生弦

有序

弦字孟清上海人性孝誼前邑長九柱閣云公見而
罷焉求于其父以為義子及閭公野處寔甚而弦克
敬養歿買山葬如禮復營怡愉堂母事公妻夫人三
十年猶一日民有盡棄舍償逋主者妻孥皇皇無栖
弦贖還里婦相煽奔悉法曉教諭得止至若羈士趙
謨廬墓教授駝塹被辟發顛疾走山澤中遇弦遂脫
難知予南園隘購地廣之子固却弗之聽併用序而
贈以詩噫豈溢美哉斯善善也詩曰

雲東富家多北堂移孝義母無此郎竹萌戴土春鯉赤
橘子滿庭寒雀黃雀為母炙魚為鮓朝進盤孟暮杯罍
慷慨氣激燕趙間淫蠅俗俊桑濮下最閒園丁菜飽充郎
復廣園半百弓報之一字一絹直疇為賡歌愛日中

瞿仲謙一作諒先世雲巖翁水雲自在堂卷趙松雪

書馮海粟序在烏涇張氏舊月樓題

黃茅斥連鈇菱沙青牯歲服官監車變遷劫灰凡幾見
自在水雲餘一家高堂巍若鏡光曉霽采倒令一作舍峰

影裊涵濡爽氣散金鯽歷亂空明兼白鳥軟莎暮石堪
枕漱偃柳為梁謝工巧汪洋海度性天中欸乃湖歌人
境表先朝詞翰兩劼敵三埋兵塵埋不得吾宗舊壇趙
全璧世所共矜神所惜嗚呼書者把筆詩者口自吟仁
義之澤詩書承最閒園丁病始興銅瓦日射烟紫凝蟻
聰快聆鈞廣奏蛇綰愧續龍鸞騰春風酒熟當過汝月色
灘聲瀉前俎破帽縱橫綉落花潭心鮫殷永絲杼相拊
一月四十五日醉莫問誰賓復誰主

朱嘉努挽辭

淮陰三月花開枳使君死作殊方鬼眼看骨肉不敢收
奉仇稱奴聽頤指經遼涉海三歲久以蝗為糧麥為酒
饜骸齧骨何足論親見徐山墮天狗今年始得間道歸
城郭良是人民非主家日給太倉粟殘生猶着使君衣
攬衣拭淚使君室涼月蕭蕭風瑟瑟回頭還語玉雪孤
勿辭貧賤善保軀瞻屋未辨雌雄烏

太真號國二圖為郡牧張理熙伯雍題

有唐社稷水山重三白楊花同一夢就中玉環春思酣
錦祿兒將犀果弄兒驕蹴踏飛龍鞚直把東君遙斷送
馬嵬羅襪污香塵杜鵑淚血啼秦鳳君不見陽臺神女
楚襄王當年元有詞臣諷

玄宗末年天降孽楊家有女俱朝列夫人身被六銖衣

自一作日

惹香烟下瑤闕侍兒春閨雉尾扇紅脂半露桃

花面似言草草畫蛾眉猶及華清夜深宴君不見娥英
泪染湘江竹畫昉見遺良惡俗

唐子華知州山水

唐侯至正辛卯間徘徊列宿郎官班是時元綱方解紉
花縣尚爾琴書閒雲嵐黃旗紫蓋氣木石牛鬼蛇神顏
峒峒樓閣密寶網翳翳蘿蕩深柴關扶藜老叟臨洄灣
琴童殊覺徒步艱何人驢背兀吟影興寄亦厭窮躋攀
君不見瀑流天半落佩環歟乃歌接漁舟蠻此中佳處
未少我鑿徑擬背盧家山嗚呼畫史五馬何時還五馬
畫史何時還

重過望亭新城二堡

丙申冬張氏築

憶昔扁舟自西下二堡相望無一舍吳藩判樞翻覆兒
窄衫小弓矜騎射歸人重經但流水亘隴彎彎低復起
長途遺庶數十家三四酒旗風靡靡君不見邠公遷岐
山衛人城楚丘外患內脩古所倖成同敗異嗟世偷

題徐氏脩學卷

有序

今華亭縣學故徐德卿氏義塾也會學燬于兵官遂
即塾為學既德卿子彥裕上陳願廣葺之期年告成

並誌諸石而士之才者咸為歌頌予詩曰

曩從辟地識徐卿義塾初開儼似黌負郭存增田十頃
延師躬淑里諸生魯墮孔壁聞絲竹吳破蘇臺走鹿麀
令尹發揮新學記賢郎繼述舊家聲太倉給米來庖舍
射圃揚旗拂棟簷登降有儀推揖讓仰瞻無極嘆高明
庭槐夾夏羣歌靜水苻涵春半壁橫把送自天麟五色
裹蹄已鑄兩韓檠

謹節堂

有序

謹節堂者華亭徐去奢居士為奉母夫人宋氏而作也初去奢在壯年負氣志部舟師隸東藩以功超遷亞中大夫江西福建僉樞既夫人齒邁即棄官歸里當是時妄躁子弟躡富梯貴恐後孰肯一審慮耶迨事至患及而蹈趙括之轍者何限若漢孝子王陽去奢其庶幾焉去奢名彥裕字仲寬世為素封之家又以庶民之孝痛自厲尤可稱也

居士前為都護侯戈船犀甲戌東甌風連蜚海青巔夜

日薄慈闈赤葉秋三組授來丞相幕六珈光動老人丘
忽興九折王陽歎絕遠長平趙括憂美筍嘉魚重鼎列
護花奇石半簾鉤導輿復見潘安賦鰲角魯如郭泰留
堂上壽康猶事績郡中歌頌迭鳴球尚期丘嫂躬鷄黍
客拜龍鸞禮並優

寄石經歷兼柬林知府孟善

時歲庚戌

謝病松江辱載臨別來兩地異徽音朝盤苜蓿齊居靜
秋水芙蓉幙府深乘日文鯨飛有翼巢雲黃鵠去無心

郡侯多暇風生塵幸說山人感至今

松江謝病後寄林知府時歲庚戌係洪武三年

十載心存祖隴田六旬病守藥爐烟南歸始遂山人願
上薦難忘府尹賢紫馬晝眠高柳日白鷗秋入大江天
戴符老去非安分浪受襄陽百萬錢

松江謝病還顧孔文觸暑慰問口號以贈

養疴涇上四逾年五畝園林十畝田白首素心無漢閣
炎風朱日似堯天已從蔣詡三開徑不望劉惔再覓船

顧或能詩頗癡絕汗流却話雪寒錢

張光弼判樞遠過最閒園

峯開南北再塵清者舊惟存張步兵一日數程風楫順
十年雙鬢雪絲輕詩題薜荔垂猿壁夢醉葡萄軟馬營
狡兔霜前落吾穀贈行聊激氣崢嶸

寄題鄉縣丞晉陽李景儀雪岩精舍

雪岩嶭峨汾水湄借問龍去幾何時荒城莫辨產蛙竈
舊隱適隣鳴犢祠春青木客嘯柯嶺夜黑昂精窺研池

要知仕學本一致松廳退食靜哦詩

過劉緝元綱碩果軒效揚缺厓體

澤縮壤裸山若孩爾家碩果熟徑開金刀下動鯉魚尾
紅椒暗結梅花胎客衣風穿寒太銳酒槽雨鳴春小來
匏瓜老繫從苦葉上林全借屬英材

張判府王上海數存問併答張巡檢枉顧

酒在陶尊藥在壺田園傍舍未全蕪三時雨候占龍母

草名十日春容付鼠姑

牡丹別名

生怪裨謔謀有獲老憐寧武

使偏愚貴游下問終身事有愧鄒書大丈夫

松守遣郡博士辟至府既病謝張上海招宴不赴
雲林一辱徵書下客舍三煩齋馬過千里快風當六月
中年斜日奈長疴饌違松上銀鱸膾酒遠洲前白鷺波
野性自今甘放逐水禽山鹿不吾多

觀靜安鐘銘還訪王靜習兼懷賴漁庄林澹菴

湧泉澹井獨經游鄭氏橋西舍最幽避地無因同管華
居鄰何道得羊裘漫推文字登鍾舞共慶章逢謝石頭

藕大玉延誰貨得雪泥行韭屈金鉤

會別馬潁漁

別業歸來千里餘秦山傾蓋喜無如青衫不污新豐酒
白髮終乘下澤車地入東南空驛騎雪消齊魯足淮魚
彼行此住情俱得尚約鷄肥落木初

聶松江遣和上海具舟餽過烏涇別業名見既病
還

荒鷄亂叫過隣牆茂宰驚來坐我床箭駛落潮千岸失

鼓懸斜日寸田方行躔却掃羈孤地奏目除名老病鄉
試憶大儒誰第一仲舒裁是漢賢良

庚申正月四日試筆是曉庭雪盈尺

洪武十三年

雪庭罷掃若為懷體力差康道氣佳鬼有文窮延上坐
妻餘法喜共晨齋江鶯春淺猶巢谷野雀寒深自入淮
挑菜燒燈連社酒本來時命不相乖

寄錢泰窩陳雲軒二遺叟

天轉雲東上六符有懷無寐枕同孤紫芝隱曲歌商皓

烈火殘經補漢儒私地春先梅老發盛陰雷疾草狂蘇
祖生遲旦踈殊甚不計中流少一壺

伏龍山然唯菴建塔松隱藏所書華嚴經因以先
妣李氏瑪瑙素珠附焉并寄是詩然長干岩高第
也

風卷重茅葺未能報先崇塔壯神僧一鰲峰湧大圓鏡

萬象天開

一作周

無盡燈負石鬼來雲似練

一作漆

散花仙

至月如水吾親手澤同悠久喜附龍函最上乘

寄崇明秦文仲

渺渺三洲東一隅葦茅先隴混畊夫道存醴酒曾賓楚
城破干將不去吳白苧袍成雛養鶴水晶瓜熟膾行鱸
相望暮景須陶寫可信歌游老伴無

懷昆山顧瑛玉山嘗棄官與家隱同里僧舍

一作寺

吳門長嘯下青龍道過能詩禿髡翁九里水雲孤擢泊
半樓霜月兩尊同黃金浮世官俱棄白石眠雲草自豐
俛仰舊游惟病在海濱倚釣幾秋風

題張後山西堂

君子堂開枕九山翠屏玉案白雲間柳行接隴鶯聲迤
棕影涵波鶴思閑伯仲賡歌皆耄耄里閭懷德半痾瘰
重過話及張公藝亦欲凌虛駕上攀

喜顏守仁教授留園館信宿

前朝進士過林扃信宿論心為竦聽雲氣夜蟠雄劍紫
天光寒入舊檀青不同嘉樹生南國猶夢鯢魚化北溟
老我歸田有龍具僅堪供卧讀牛經

辛酉立春日溪園試筆寄錢父衲張雲莊二叟

雨雪相仍歲又徂短衣楚製老東吳寶山偏聚刑餘鬼
空谷先逃行獨儒海霽卿雲升日角岸寒髡桡長冰鬚
為書春帖嘗春酒早覺蘭風拂壽觚

溪園秋燕又春鴻漸老形骸土梗同遑恤梟雄奔在野
敢聞騷北集生風梅花占閣孤高雪荻筍穿坻短小紅
抱膝微吟忽成調一雙瓢影順流東

寄張戶部以忠就問死節丁敬可平章子伯堅消

息丁嘗為主事張其吏也伯堅又嘗從子游於金
陵

侍郎南下喜尋盟有子能官養復榮淞泖雪鱸來曉案
伊梁金雁歇寒筇職方圖版勞賢久神武冠纓入畫清
聞道舊趨丁相幕巨源於紹不無情

題朱松石左轄歸來堂

舊時山色抱新堂西望遙伸燕賀章金甲樓船爭破浪
角巾藜杖獨還鄉宦孫影跨松間石鶯友聲過柳外牆

盡屏陶朱老

一作舊

心事黑甜清洒

一作枕

到羲皇

同誼書記遊查山留題淨無餘

一作染

西南林壑

地湧叢林小翠屏
海吞孤嶂半螺青
岩扉老衲忘人我
石甃神丹護甲丁
吳甸土寒黃耳魄
春山草厭白蛇腥
放歌適在風埃表
幢節浮空若下聽

寄澁蘭江長老時其徒勝文海主東禪乃蝦子道場

菰採三江同謝徵
詩狂禪喝罷憑陵
乾坤影合中條壑

日月輝交文室燈遺世久忘形似木扣雲曾得話如藤
願言流水師今是萬翼神蝦再上升

趙破螺徵士過園館言近况飲之以酒壯之以詩
牧羝山澤避徵書還守駝墩小墓廬乘角履穿猶說劍
一錢囊剩不思魚潢汙毛薦寒逾肅織誦聲連夜不虛
况復永嘉天派在左懸朱轂相王車

同錢思復提學曹新民教授過松庠儒職沈純軒
沈郎儉謹居松郭新築純軒小似蝸天厚水雲千畝利

世輕鐘鼎五侯家執鞭

一作邊

況是清脩職登饌真便老

鈍牙十載淡交方爾過萱長如帶杏初花

辛酉雜題

係洪武十四年

斗酒豚肩驚紫裙過家無日淚橫紛兵餘姊妹皆黃土
天晚江山自碧雲陸喜在吳嘉隱德隨何遭漢擅名文
先人遺體猶清健會倚陰陰里社枌

遺經姑置楚包茅新筆工書蠱上父利盡島溟珠象郡
道湮鄒魯鳳麟郊看雲

杖名

暮影齊巾角滴露

酒名

春

聲落枕凹自判優游不堪事鷓鴣添室翠分巢

是歲征雲南元

梁王
自縊

槿籬莎徑入林堂春作無牽午漏長音歇野鶯新綠淺
影浮潭鯽小紅香誰家數應中和節十畝寒輕二月霜
忍貫緼袍償酒債時人將謂獨醒狂

寄完節清卿叅政

六月青陽一葉秋大叅躬自出遮留軍中取印舊赤手
林下墊巾新白頭闔郡山園朝爽競幾人漏盡夜行休

宴游莫聽堂堂曲
蟹紫橙香風露稠

一作秋

書西廈時洪武丙寅沿海築城

係十九年事時多憤懣不平

牀頭鷗卧久空金壁上
蝸行尚有琴孺子成名狂阮籍
霸才無主老陳琳
虹霓氣冠登萊市
蝙蝠群飛顧陸林
環海烟沙翻萬里
連村霜月抱孤衾

秋詞

香散天街靜玉珂
露臺風殿夜如何
星從河漢淡中落
秋在梧桐疎處多
鸞影不曾離寶鑑
蛛絲先已綴金梭

君王璽館詢遺事却擬鑾車共載過

沙館簡陳氏五昆季兼示門生履道輩及似沙彥

約沈鄉老鄉人陳漢翁時至正己丑

時方太平無事

家家門柳暗垂橋曲曲沙村遠應潮貧女採藍輸盡屋
閒僧搥鼓慶青苗大江春信豚魚起絕島天荒牡雉驕
地主幸敦仁厚俗欲從姍睦論虞姚

聞臺中丞陳子山死節兼懷陳東流

身繫存亡社稷秋世皇神主義同流火雲鑠海黃金冶

朔野垂星赤玉疏同產忍聞龍死蜀斯文真歎鳳哀周
尚思弭擢君山渡不及相陪宴太丘

東流常請予陪宴公不果赴

書無題詩後凡三首偶感燕太子丹事

火流南斗紫垣虛芳草王孫心

一作思

愴如淮潦浸天魚

有帛塞庭連雪雁無書不同趙朔藏文祿終異秦嬰袒
素車漆女中心漫于邑杞民西望獨踟躕

塞空霜木抱猿啼草暗江南罷射麋秦地舊歸燕質子
羸封魯界宋孤兒愁邊返照窺檣榻夢裡驚塵喪鞬觶

莫識白翎終曲語蛟龍雲雨發無時

幾年新膽泣孤嬰一夕南風馬角生似見流星離斗分
謬傳靈武直咸京九苞雛鳳冲霄翼三匝慈烏落月情
縱少當時趙雲將卧龍終始漢臣名

懷馬文郁御史靳惟正同知兼簡陸公敘薛孟式
山茶雪蕊渥丹唇轉老東風倚杖身彗尾封狐營窟夜
朝行高雁海天春磬裏鼓武知何往瘦島寒郊不去貧
竊喜孤輝上弦月一杯聊勸若為親

孤一作孤

寄旺扎勒清卿參政其壻某近卒

大叅久別況如何萼綠花開雁又過
賣劍買牛時可得據鞍上馬老無多
魚隨春信登先豆醵匿寒形在舊羅
孰料周郎美甥館一床鴛繡拆孀娥

懷故園時寓隱烏涇十有七年

薇花空復故園情梧樹猶懷里舍名
山抱墓田巡獸白
天流江涌一作浦去鷗清
蛭滿載憐洪嶠弩矢前驅隘

馬卿他日苟歸何藉口一門無恙讀書聲

題涉難錄

有序

己酉四月

洪武二年

松江里長以今元年

戊申

沒官秋糧

坐流移

一作移易

罪者百九十二戶徙額上予友生劉冠

時在徙中凡遇道途之艱山川之險與夫先代遺跡

輒形歌詠得若干首題曰涉難錄及事白釋還也謁

示予寓隱其留關山堆云關山高兮磅礴上靡極岩

千仞萬天咫尺朝嵐夕霏輜輳陰絕磴聲耳石攢戟

嶺半塔邊忠武

巴延丞相

泉不盈不縮通海脉仰頭試望

榴棘中羊坡鳥道崎且窄傍有餓饑屍前有猛虎跡
上嶺如上青天難下嶺如下萬丈澤昔聞劍閣險若
此我母胡為此行役母兮母兮回顧兒欲語復咽
愁雙眉兒兮兒兮母手攜欲上却下展轉悲撫心飲
恨言向誰鷄樹萬一東風吹才行緊可見矣為題八
句

百室餘千口遷淮共慘悽關山中道惡母子萬行啼月
黑相隣鹿天青忽聽鷄哀成涉難錄田里慶安栖

寄信道原長老

舊隱過鉅錫相違已十年
慚非習四海為友釋彌天
驚巖花白鷺池水石圓何
當地密邇瀟灑論詩禪

遊查山登僧雲石閣扁曰虛翠留詩閣中

仙跡遺丹穴僧坊倚石林
中宵龍甲雨三日虎歸

一作
蹄

淦青薜崖容立黃茅海色
侵為尋霞上句鉄杖落清
音

芮庠卿邀費孟霏同知陪
酌背郭堂既同晚步口

號

罷酒出前楹霜寒着面輕林腰烟帛束天角火鋒生卧
木橋通野踈甬水隔城寬袍曳屨竹俱老愧宵征

挽范德原

有後序

鶚薦書長却臯比坐始專春風來學地寒雨送喪天范
式車何往黔康被不偏樓居敞晴雪憶說賀翁賢

德原諱致大崇德人修行博學主無錫鉅家會淮張
入吳辟儒教授不赴既陪臣於張者禮置焉德原曰
道固在耳至則衿誦雲翕雨應不幸以疾卒賀丞相

惟一嘗延慶元俞

一作余

紹芳訓其子子不受教朴誤

著其面微血子奔懇太夫人太夫人怒適賀公退省

夫人曰而祖留守建馬上功無膚髮挫撓今吾孫奚

過師撻之甚耶賀侍久出命熬羔具醴宴紹芳至執

醢再脩金繡雙段徐謂曰豚犬愚下姑荅鞭策勞耳紹

芳繼有薦除臨海翁仁德元由第進士錄事溫州妻

早歿二子知承家有汴宋趙宗室必欲以女配仁力

辭媒因告方氏師昏之濫乃佯諾處之別室半載方

氏定仍歸之嗚呼德原已矣當時客樓霽雪西望九
龍山清寒洒面而席上所言猶在耳也予併錄詩後
俾叔世曉賢者禮義所自出二公其賢矣乎

庚申七月一日

一作首

時謝病松江

洪武十三年

金火蒼龍角門庭野雀羅哀才歌鹿遠清枕夢魚多隣
有通財好官曾勸駕過尚平償債畢晞髮石林阿

過翟雲莊觀唐功臣杜正倫下凡五十三人圖像
風氣開龍馬天機貌鳳麟衣冠中古制經緯一朝臣河

水移源久雲莊盟露新相觀背搖落益自重遺身

寄題胡安州弔文萬山草堂

孤舟西蜀角一室萬山分地雜刀耕戶天垂井絡文獸
蹄交雨雪龍氣變朝曛倅駕何為政蛾眉秀不羣

哭楊生士中

門友南遷歿初聞實慟予有天知孝友無日見樞趨壘
護懷春燕巢安怨夜烏埋光在別業吟思滿烟蕪

過沈槽居炙艾

風濕相仍哀謝牽小樓肱曲艾吹烟盤蔬喜進先生飯
瓮酒羞為吏部眠泥巷蠲歡梅子雨雲衢虹飲橘陰泉
華陀弗視曹瞞疾何愧龐公采藥仙

題泖壩時主僧賢如愚不在夏生禹從遊

何年窳堵聳奇觀勢若蛟龍上糾盤秦縣赭衣淪鬼國

泖係先秦
因倭縣

梵家寶藏壓驚湍野瞻雨黑重燈夜天卧空

青一鏡寒欲買扁舟占漁戶老緣無力候衡官

謁梁黃門侍郎顧公諱野王祠

世仰希馮一偉才亭林猶歸讀書臺呼鷹日落荊州歎
遊鹿春深茂苑哀輿地河山曾版入招提風氣再天開
鐘聲澹月香雲裏旌騎疑從野色來

贈嘉定楊一溪道士有序

丁未三月晦松之上海大姓錢以憤變據松城其黨
入嘉定執新守張率在龍江道中道士楊仁實素負
氣誼蓐食草屨毅然奔救得止既錢敗邑以率在民
不知兵而士儒咸德楊多形諸傳贊予與楊又素交

好為之詩云

先是徐達等由湖州錢塘取
松江太倉崑山獨吳城未下

膠城外史七尺身力全新守出兵塵救燕曾聞齊義士
叛周自是殷頑民三江月黯血波夜千室烟回陰谷春
試問玄都看花客幾多芳草不歸人

題宋侍郎衛敷敏諫議藁後

有序

藁中乞褒顯死節劄二韓雄巡檢涇州金人南侵守
將請降雄乃力戰敗擒不屈死霍安國守懷州列城
皆破懷賴安國以全敵衆再至城小不能禦遂自刎

悉被害林良罷戰死河東陳惇河北遇殺李振陷沒
於燕王雲聶昌陳過庭出使或殺或留汴陷左右班
直將宣李福欲率禁旅衛駕突圍以遁閣門祇候吳
格謀與衛士斬關出劫兩宮於敵營並機泄殺之他
若二聖可還之策東南戰守之䟽辭義忠激猶嚴霜
皎日至如卓節偉蹟見諸汪藻誌噫後昆尚恩光大
所先乎哉詩云

奉使旃除建節旄歸來獻納殿螭坳東南戰守材誰脩

河岳英靈夢或交城下盟渝龍馭失日西戈寢虎皮包
斯文三復精忠在謾謾松風過鳳匏

寄內兄李彥梁姊夫愈仲延二長者

小山大石網船春江鱗河鮪柳貫新去亂漫羸十首作
思歸惟有兩人親梨花酒洒清明淚麟趾金銷第幾塵
割臙啖豚經訓子白頭相夢到朱陳

春雪園偶題

菜簇春盤春又還椰榆何物老相攀永生前飭瓊林案

雲覆長衾石壁山魴信徒勞餘尾赤豹能真隱備圓斑
雪消十二街頭徧靜得袁安高卧閒

學跛中雜興二首後承林準叔平枉問

經時蘿磴絕攀躋注目傷懷夕照西古道千金求駿骨
世情壺酒賽豚蹄黃沙白水光相亂青壁丹崖秀宛齊
果熟望中風自落固應鄉幼迂扶藜

風物踈清塵事稠才難殊嘆古時流草玄不效龍蛇日
撾鼓空催鼠雀秋病有過家期已晚官無搶地拜應休

星軺度驛嵐州使

謂林

喜說儒衣仗節遊

甲子冬偶書

洪武十七年

雲東亂定少新知江左書來有跛兒才盡罷為文自祭
醒狂寧要鍾相隨天家青女催衣急漏水金人上箭遲
却喜故妻原上樹十年羈羽托深枝

東霞

東霞有郁頃雨于穀旱魃方酷曾不及霖吁嗟乎郁兮
匪霞伊旭東霞有雯頃雨于粉曾不及霽化為火雲吁

嗟乎雯兮匪霞伊昕維昕維霞孰得指兮維霜維永我
躬履兮丘樊虛涼豈無枸杞采不盈簍聊永暮齒聊永
暮齒亦曰隱死

春雪封條

春雪封條載霰載電羣陰淫威陽邈應角予適有酒言
崇于庖匪庸解寒庸以解悲喪不知其幾周兮曰心曰
柳亂不克忖其滅兮曰狼曰狗於昔屈虞成騷成書一
時行獨曠世道俱大江亢亢源始濫觴泰山奕奕雷至

穿石彼桃彼李天穠其華松栢貞固受命孔遐雪聿除
矣青園微和君子焉同式燕以歌

題崑山顧氏畊讀所

彼瘠兮甌窶畊弗力兮薄吾收於皇兮墳典不讀無學
兮沒齒有恒蟬有綏兮蟹匡豹霧隱兮蔚章畊為春一作

養兮學為已猶干祿者皇皇婁之濫濫作兮崑瓚瓚卑

茅椽兮深蓬闕身忍潔兮沮溺道邈師兮稷顏脉望仙
兮芸黃其槁枯雁鳴兮白雨增潦顧天窮兮並臻矢素

志兮終抱尊有酒兮思與傾倒

風條檠鳴

風條檠鳴遵野微行十室其五父夫徂征問此何時維

春發生風鳴且止雨淖泥泥父夫退

一作退

鄙妻子從從

維時長育人莫豈弟露始淢淢霜既凜凜幸焉冬暄虺
虺迭出遺黎幾何憂與歲畢月之盈矣虧餘一郭日之
蝕矣陽氣回薄於仁后皇曷威曷虐象犀無尤齒角其
尤鳳音悠悠麟趾脩脩聖不復起嗟誰心東周

即事五首寄桃浦諸故知

後附跋

素癡得名侯君房自享大案焦征羗莫嫌衛旌不舉筋
口簡授使多嚴光世間堪鄙是何物糞上之蠅褲中虱
後園石壁倚秋林醉有髻孫旁執筆

山床折足琴暗徽種菊不種西山薇願從漢士碑有道
夢遠秦兒歌無衣閒園不入烟火境巨浸盡漂桃土梗

老伴惟餘卧隴雲抱晦含光體常靜

兒一作鬼

有章擲還太尉閣有版不受丞相垣南朝天子許謝病

竊長木石儀鸞園平生氣節詩千首才非元亞山元道甘

劉後

劉靜修

素聞魯廟鑄金人晚學程門坐泥偶雙平原

衷

新原名

庶金歸他日壙銘辭大手

貴不難得富可嗟二事亦到園丁家雷王藥吏錦襠袴
野藤絡樹金銀花園丁橫節坐梧下竊愧長年釋畊者
身膏草野身土苴語孫稷耒莫輕把

東坡楚頌存虛名止烏作亭

烏涇新作

殊有情枇杷換葉何

青青雪中開花來遠馨多仁多核知爾少栢樹根添鄭

玄草慧海禪師識侯景華容女兒哭劉表如何太白謫
仙人竟坐夜郎唐絕徼裁詩寄與多才郎塵間寵辱要
相忘灞橋吟興驢背上月盡冰壺蠶味長

是詩五首先君子即事寫懷向嘗寄桃浦諸舊友者
也先君辱諸友見知之深每一往游追從款迎惟恐
後及以歿告孫弘叔遠歸厚謹先王庭與立具禮來
奠而李韶九成侯性自誠洎雪城呂聞二上人亦踵
至焉明年冬掖走謁以謝叔遠懇懇勞問因語詩卷

刊未完畢叔遠慨然倡捐重貲呂聞并率諸友助
之亟召鑄工俾終卷帙附識詩後不敢泯其實也不
肖孤掖謹識

文翬洲倡詠

有序

予自至正丙午僑寓最閒園館時黃浦中洲坐僅尋
丈許今自延廣三十餘畝歲賦官入諺曰浦夾輔洲
如崗如丘實安衮衮流洪武癸亥始携里叟門生共
登臨焉適羣雉翬映鷗左右衆請名是洲因名文翬

而倡詩曰

盧涇初避地黃浦漸生洲里諺歸材傑天工障濁流望
疑堅壁守醉覺小山浮仙躡金鰲背神迴白馬頭根盤
連厚軸形勢壯遐陬漁倚盲風釣商蔽疾雨舟蓀鞭伸
玉節荻筍屈紅鈎烟火鮫人市雲霞蜃堦樓沙津魚鼓
急水柵蟹燈幽艮震方先曙吳淞木始秋老懷龐德隴
隱覓謝琨丘僮御爭先導吾儕試一遊賡歌清氣合樂
志古人侔可信文翬雉能盟懶性鷗

省先隴還舟望九龍山蛟山遊鯉山懷江城親舊
無寄示內姪李用外甥俞堇二首

兵甲氣全消心旌北向搖鯉昂雲際額蛟斷草間腰習
隱由中歲辭徵涉兩朝莫期歸衣錦曾鄙去題橋

秀挹九龍山還鄉未是還水風秋意爽霞日曙光殷隴
畝諸甥托詩名內姪攀城中盛親故天與幾多閒

題朱廷佐聽竹軒

閒軒能聽竹古意木蕭蕭先代多充耳伶倫得奏韶寒

兼雲嶠雪秋殷海門潮過客詩凡幾天光酒面搖

哭夏生幼文

秀色三花粲才華五鳳能星娥銀漢會天帝玉樓徵衣
靜庭闌綠窗虛雨雪燈重過槁容客猶覺映壺冰

乙丑秋書

腰痛非千米眇昏漸廢書靜知天運密老與堦程踈綠
稚黃甘外紅鮮白小初兒歸共貧樂容易歲云除

丙寅清明日書二首

清明二月晦重潔祭餘觴旁舍火新活兩孫衣漸長膝
前簾幕雨夢裡隴園霜何意辛夷發花叢紫筆房

破屋遶王田人生狎狗鞭知章歸入道元亮醉逃禪水
蔓縈風亂山花影日圓黃龍浦東直堪隱戴家船

園館雜書四首

竹樹藏山石作門魚砧水帶洗花痕鶯聲又在鷄聲外
老不勝官只住村

石拂蒼雲坐若枯強名何物靜相於薰風似識閒邊事

椒葉芹花水一盃

青春白日去無還天假溪園小有山林下軟莎遮坐石

何人來對片時間

姝鄉春色不曾

一作睡邊

濃才力新無病思慵一枕清風聞

格磔半餅香雪浸蓓蓉

香雪酒名

輓高僧炬照菴

有後序

石壁雲無礙曇花水絕清莫為房琯將四萬可憐生

予自龍江拏舟遊湖山時照主香林嘗延入懺室

一作

堂
躬喚霍舞作香茗供陪觀蘇文忠題名且示學士

黃文獻文一什留繼其宿山故事不果瀕別贈照二
首云學士愛山栖一年韓衣蘇帶迴同緣書臺未築
老僧在金粟滿林香大千路入飛來急雨晴水懸風
磴助秋聲人家大樹都黃落白足山人自在行遂還
松曾不踰月隣敵大至照碧瞳長眉烟霞標表義然
獨不去兵有樂為役爨汲者香林既宴然照乃往脩
北寶塔善行益彰壬子歲赴今高僧選居無何沭而

趺坐卒文獻字潛卿與照為方外交及黃歿擬築黃
公讀書臺傳不壞云

梧溪集卷六

欽定四庫全書

梧溪集卷七

元 王逢 撰

連理梅頌

有前後序

逢謝病最閒園之十有七年上春海曙岩左蓁德池
水陽梅大小榦四氣合理屬形色無間特然危立當
龍門浪石偶始見焉僉愕愕以為瑞越二月二日家
姬告誕男孫乃仲子攝所生者是日長庚宿于奎柳

逢命躔酉分適符而梅也藂萼玉作花香艷景意動
映會洽宜乎觴而頌曰

猗歟梅瑞岩壑合衆榦返大朴理屬氣強無弱先春蔓
根性孤曩感清影肱江韻皇英颶弗撓雪愈貞石丈盟
世澤涵嘉應毓陰德積裕慶續宗母各家惟睦猶實有
仁後其蕃熟也耶

逢頌梅已竊興憶故園菜亭南紫薇木連理尤特異
先嘉會君嘗慶宴里儒陳復雷輩于亭上時逢僅有

長嗣掖從在侍陳執觴起進予曰而大母徐

諱閏芳

屬未有後視

一作祝

而伯父

諱忠

甫三歲襁負避亂兵

夜仆葑蕩數濱死有勸棄之者而大母輒涕咽良久

諄語曰既予而棄焉與殺同寧死生俱也卒脫于難

晚始得而父

諱惠

迨冠吏他郡月寄俸具鮭腴餘則

班諸族之貧者寒陰雪雨隣伍有不能舉火歲率濟

饘粥而大父潛昭翁元初卒相傳好延士數至靡怠

遇事謹敏宅心夷厚鄉稱長者而伯父至析爨也而

父義甚同胞倍與產業而姑歸而蚤喪又躬為殯
埋盜盜其丘木則愬于官仍歲謁時祭之兩甥女還
往三十年卹養如一日夫和氣致祥植物先應此豈

偶然哉座客咸韙之盡歡醉散其所言厯厯今不忘
於乎釣遊先跡愴墮夢境流滯餘喘行同朝露莫知
人世竟奚如也雖然天理不泯世澤或未艾幼孤謂

諸外孫壯寡謂孟仲二女乃復相尋於家事捐城跡

屏病句有司迫於起藥石伏枕荒寂間時吏部敬依

起取惟爾掖等上憲繼夫志下見篤于行若孝若弟大
有實茲頌聲則王氏黃灣諸靈將不在他日佳子弟
一作是望是慰是年壬戌三月初度日書示掖攝拊
孫係洪武十五年

隱憂六章

時有司奉吏部符
敬依令旨起取

箕舌兮房耳交燭兮東鄙顧謝病兮四三胡謠詠兮迭
萋菲鵠高飛兮翼焉假蘭幽幽兮林下爛晨霞兮莫飡
潦秋清兮爰酌之斝

獸有越陸魚有跋扈居巢處穴知謹風雨卒沴臨兮丁
載周以朝以夕兮五春十秋年老癯病兮勿遣有詔人
事嚶嗒兮紫芝藂桂聊夷猶

災團團兮藜葉長鏡吾知兮眉如霜車爾華兮服爾章
素履諒无咎兮貞也悔亡所未亡兮隱憂中腸

虞工不往兮招維旌魯有兩生兮沒齒無名古道悠兮
時事并疑莫稽兮拔茅征貞菊延年兮姑飡以露英

鷄鳴嘒兮蒼龍上蟠霍駕其朝兮竊謝病枕安須捷

楚

人以衣被垢粦為須捷

蕭蕭兮雲栖簷端於乎策良被

輕兮七子闕下白帽管寧兮亦容于野

牛山兮鴉林林充兮培深彼數澤兮大獮禽於乎窮簷
短景兮身衰遐心

震琳

震琳震澤中洞庭樂石也

震遺琳八琅音變擊節猿應吟却西琥謝南金樂哉幽
深

超果寺祥慶極師頂相贊

講師

骨聳岩厓胸含冰雪具正法眼鼓廣長舌坐斷泐峯高
清孤絕將使一華五葉之傳三草二木之喻殊途而同
歸于轍者耶

數珠銘

有序

瑪瑙數珠連瓔絡五事逢顯妣李氏諱靖真之手澤
也妣氏平居江陰時嘗諷心經暇舉是謂逢曰吾有
不可諱必納之窳堵中逢謹答曰唯命厥后倉卒去

兵難舊物多所失遺而珠儼存追惟音容之隔已三

十九年矣今年癸亥秋

洪武十六年

雲間會伏龍山唯菴

然禪師於松隱禪林築報恩塔落成用藏其所書華

嚴大典乃以丹髹小盒置珠而附焉於乎妣氏念其

忘乎重銘諸石曰

唯心淨基弗垢弗隳手澤塔是歸倘神龍護撫

真率軒銘

有序

邨人士許思敬營別業於華亭縣庠之東偏嘗懲世

之狃儉失常肆奢致劉者夥矣乃慕溫國司馬公之
真率也以名其軒而介合肥翟守仁氏徵余銘銘曰
肉不掩豆齊相嬰脫粟布被漢臣弘日食錢萬晉何曾
後賢真率世著稱簡素易直子其承

儉德堂陶爐蓋座二銘

維蓋覆爐猶天覆仁靜翕太極動舒陽春涓塵海岱巨
細念均至治馨香風氣載淳

右蓋銘

后土其載磐石其固鼎位奠寧香是用籲何敢事天存
養無素願茲墊民環堵永措

右座銘

節石銘

石有節猶婦有烈孰謂之夫也志可奪乎

擊石一首癸亥冬作

有後序

古垣黠鼠窺篝燈踈簾翫雀啄硯冰奉天殿旨聽野處
擊石為歌媼所稱孝姑周褚節彌厲挿袂播穀蠻謳避

陳金寡得園種果虫蟻餘生免湯火韓錢生長富貴家
義不再醺繚綿花葉徐竹房日蔬食隻影縫紉屏塗飾
杜曾冰蘂善自持兒作僮傅身母儀清河山孀手摘漆事
母不欲煩兄嫂吾家髻女双練裙孟也拚牙蒙焚氛仲
也藥種躬培耘備嘗荼蓼亦厭聞君不見縈絲貝織勒
歲貢龐吠鷄鳴驚夜夢鬼車憂憂風雨送錦字啼痕忍
淹鳳畏途征嫠雛與共目冷青紅蜃交螻嵐蛇霧蟪蛄
林洞筍莫棄遺名義重時哉坤貞何乃衆君不見天孫

左降雲擾鬚霜姝月姊相高寒西王宴饗瑤池干衝牙
觸璜鏘和鸞瓊真魚貫金桃蟠鳥使下上鋒劍翰於乎
漆室處女紆憂端猶有薄薄翠袖空谷幽居安

右擊石蓋傷歲景短迫男子多故婦女能勞而貞焉
後皆鋪連空房遠道之不失其守者或謂予老伏荒
遠無補于民生得錄數節義鬼亦足自見然尚有遺
者其一夏葉氏事姑盡孝敬翁病痿凡七載日滌簣
易席必親翁卒喪製為強宗所奪躬再備弗較至辭

邑間終身不矜怨其一徐謝氏諱蠲素凝重當苗兵
燬掠謝從夫逃適苗遇驅辱之時里閭少艾被繫相
屬謝阻板橋遽厲聲曰橋有柱我儂趨虜可乎苗怒
殺之既而悔語衆曰彼烏涇之清濟也衆喑喑去於乎
元季不匡若葉謝者譬服古冠珮甘碎裂于食弱肉者
側此無他世教民彝未嘗一息絕滅也逢追書于詩
左

古懷

周秦廢兮民無為生逃而學老兮玄教浸興千載兮廬
社晉之瘁兮賢蓬林下菊既穢兮蓮有芳荆軻詠託兮
古懷疇寫

石田研銘

石應兮文躔窪涵兮紫烟假吾道有年育材飯賢嘻世
斯田斬于天

采芝辭

有後序

維北土岡兮維時金商芝藂生兮色中央莖玉紫兮霓

白裳躬露采兮奉先聖王噫鷹擊兮草霜尚父邈兮斯
文祥

予自幼至壯詩夢頗多地荒存菊本人老發梅花紅
芳飛血盡黃蝶上衣來犬眠牛斗地鯢躍鳳皇池乾
坤人鮓甕歲月鬼門關雪落蘋花盡青浮山影來簾
卷東風燕子還天清月浸淡梨花最後得艸霜鷹始
擊之句今年丁卯垂七十矣八月二日已酉園北
小山濯風所見芝藪茁草間因發笑曰靜觀世間何

者非夢耶遂作是辭漫紀如此

丁卯洪武二十年

瓢湖月夜舟中短歌

驚如舟兮舟如驚我不知乘風兮風乘我為澱飛爽兮
瓢揚漪星月倒兮相迎隨降沱寥兮金節舞空明兮文
螭澹遊忘歸兮神昇天借嗟白日塵一冥兮曾孰知有
清夜

壙銘

有引

戊辰元旦書時壽七十最閒園丁王逢門生周畿刻

驪駒山

園北小山

儀鸞水

所居張湮

首西正丘有斐士

詩旌忠孝節義鬼幣交將相公侯禮攜家辟地兩辰已
布衣蔬盤善修已草木禽魚知姓氏昨惺惺今起起無
強近親鮮昆弟有芹薦者二三子

美瞿彥德

有序

彥德名懿元故兩浙運使霆發之從曾孫也幼孤事
叔猶父同居三十年一旦以非罪在徙中懿泣愬于
官曰罪合坐懿叔無與官義而聽之及事白歸叔已

病歿懿延師勗教其子里士鍾景元謂予曰運使公
之子時習仕至潯州路總管妻張氏鍾氏前後並事
母姑葉夫人盡孝敬懿於家門無忝矣乞歌詩美之

詩曰

海邦甲第連雲起時異禁殊多外徙瞿家叔氏勢蒼黃
姪動中心不能已廬殫地竭籍送官毅然代叔人具歡
鵲烏罷遶星月夜鴛鴦雙渡江淮寒望中溝填或野露
雄風獨轉金鷄樹涼天移席竹林遊曉漏整鞍茅店渡

叔氏云亡弔影孤躬親致禮師訓謨行看長大率相保
先為歌詩歌道途

吳仲圭山水為李源復題

李諱汧

我生未了烟霞債見水見山心所快兵戈瀕洞十年餘
真水真山不如畫梅花道人吳仲圭斯畫乃出胸中奇
無聲詩託有聲寫汧也笑謂非公誰沙洲吐吞石齧齧
三脊仙茅雜香杜錦繡天開靈鷲雲笏竽籟過蒼龍雨
一杖商翁自外歸方舟漁郎若相語葛藟古木苔蘚皴

形若槁立膝理春屠蘓略約密映帶老我顧作漁商鄰
漁或釣周商避秦

趙文敏所畫唐人馬楊鍊厓魯道原二提學詩後
為桃樹浦王叔潤題

肉駿花驄真權奇彷彿出浴西瑤池細看元是勅賜太
卿者鄧公奪取少陵哀賦詩黥雲湧身霜四蹄一目冀
北空馱驥全神勃王房駟黯雙耳尖卓昆侖低奚官玉
面如滿月

闕

次韻信道元長老菱溪草堂見寄之作有後序

石橋方廣苔蘚生中有萬歲之紫藤雲深幽磬響或作
溪面落花香欲凝下方豐蔀金碧氣老禪跣趺蒼翠層
天柱家山甚峻爽杖錫讓爾先攀登

道元少與茅山道士張伯雨前進士會稽楊廉夫齊
名嘗有西湖竹枝詞云湖西日脚欲沒山湖東新月
牙梳彎南北兩峯船裏看却比阿儂雙髻鬟至今為
絕唱或者病其浮薄廉夫謂曰金沙灘頭菩薩亦隨

世作戲耳或乃釋焉誠演二公與道元同字皆博學
負重名而道元戾契度世僅住小山林而已今年八
十餘託友生錢岐以詩見寄且囑曰幸致敬席帽翁
予不久天柱家山去也於乎台雁山天柱豈特道元
龕在耶

丁卯冬季即事

庭樹禽翻鷄唱初
鉤簫錢罄老饕厨
冰壺不忝元脩菜
箬葉何慙丙穴魚
一線漫長迷五色
寸陰真足助三餘

暖隨水霧元春發寒併冰山與歲除

立夏日書

孟夏四月朔薰風當午時諸陽老益壯一氣轉何遲
錦帶花裊裊黃精實累累青陰覆盤石無意坐彈碁

病中述懷

終老甘農圃烟蔬帶豆田無官天曲宥有住世旁緣暖
趁茅茨日寒知竹栢年私懷復何慊吾道不無傳

壽亭成

壘盡浮春釀親朋慶壽亭
麻裋萬石長襪帽小城丁
易卦懲同吝騷詞詫獨醒
三郎市諸藥魚菜附歸舲

題管夫人畫蘭

趙管才高柳絮風水晶宮裏寫幽蘂
秋來紉作夫君佩
笑殺迴文漫自工

題二喬圖

並看兵書白象牀半生鴛被拆寒霜
英雄自伐蛾眉斧
不寤齊王聘采桑

題寧戚叩角圖

南山石爛短衣單叩角歌興夜未闌
一出客鄉成底事
莫將堯舜料齊桓

謁陳烈士廟墓

有後序

夙負聰明號聖童
野狐西闕白干虹
颺言佳室青烏子
效順長江赤鯉一作鯉公
香案山朝雲決鬱翠
茵沙枕樹

龍慈饒夫釋耒談遺事
餉吏連艘酌快風
祀典寵輝荒寂表
靈休昭降混茫中
蘋蘩為寓維桑敬生氣
英英月

在空

予謝病自上海還省江陰先隴道謁夏港陳烈士諱
忠廟墓因憶幼侍大母徐氏傍嘗聞說烈士產杭宋
未神采煥異羈貫當盛暑躬送壺飧于力田者隔溝
潦輒騰擲畀之若有神助壺未始傾覆及叩妖祥類
多中由是合境稱為聖童迨笠墩寺黨弗靖守將莫
知禦備乃問諸烈士首對曰化機不可泄既不獲辭
復曰某日某時必矚城廂校率兵如期以待亭午浸

解散而寇果至縱焚掠去守將無以藉口竟誣烈士
殺之時白氣上千頃而雨父老謂天雪涕云姊夫俞
善善曰烈士葬後有陰陽者流相墓位向當出土祇
與侯封等其先蓋業漁同漁者網得一金赤鯉殊長
大鬣尾奮掉目矐然光射其先驚悟放之江是夕夢
神孺告曰吾龍王第四子也誤麗之網賴公活焉公
之孫姓將必陰祐于民社于洋溟者今烈士感通猶
影響而比南餉舶安輸逾百稔田叟屨氓及四方販

中庸夫爭相奉香幣致牲醴顙禳恐少怠夢誠應耶
夫幽明二支一本也烈士誕鍾炳靈生髮甫燥遽不
幸死非罪而英爽凜卓弭災捍患且久茲膺褒命自
天廟食世世視彼烽塵間起崔澤魚肉鄉子弟妻女
者不翅數十慙汙于九泉也已予忝生同里懼泯遺
跡於清暑假謹繕錄前後所聞于詩左庶俟來者于
寶氏叅考焉善善名思齊子梧溪王逢

過徐氏寬閒軒居

友諸門生聯句附

百畝寬閒野三間低小簷平生遵儉德中歲謝勞謙藥
火蒸雲灶茶香出午簾泥塗盛車轍不是學陶潛

園林間獨樂逢几杖喜同操餉道疲牛馬名柴車載

榲醪詩催時雨足名賢聚德星高一水團精舍名餘寒

戀敝袍少陵糧芋栗名仲蔚徑蓬蒿鷄對清談暇名

魚忘赤尾勞香泥融燕寢名新盜響蠶繅交篤雲霄

義名籩兼沼沚毛張儀徒事客名郭解漫矜豪安得

扶衰憊相隣遂晦韜達

周芙哀辭

有序

六磊周芙本細家息孔胥妻也孔素無鄉曲譽乙丑
冬舟過塘上鄉人偽邀飲醉寇舟以民害愬于朝孔
自度不免密書與妻蚤尋仙遊庶絕軍配族黨難諭
之其妻覘得故神色不亂言笑如平常且備盛酒饌
延親隣是夕素服雉經死時年二十九孔聞之曰予

伏誅梟木無遺憾矣周

一作園

西媼張氏云

潢潦奔流合東南淑氣鍾憐生俱薄陋就死獨從容道

殢懷金壁閨情采菲葑親隣競嘉嘆不復佐嘗饗


張貞哀辭

有序

予門生張敘女諱貞嫁海縣周曹以復入公門刺而
瘐死先是貞在徙籍惧配軍投秦淮卒及周屍過其
所貞湧浮水面神色踰五日不變認者曰此呂學諭
甥張訓導女也殉夫歲聚寶坑舅姑能無念乎予哀
之曰

堂上嚴君海縣儒素聞出嫁義從夫佳人命薄非今日

那得將心報舅姑



梧溪集卷七